

ORATIO

DE

Physiologiae Explicandæ

MUNERE,

EX

Celeberrimi WOODWARDI Testamento

INSTITUTO.

Just Published,

ORatio de novo Physiologiæ Explicandæ Mū-
nere, ex Celeberrimi Woodwardi Testa-
mento Instituto: Habita Cantabrigiæ in Scho-
lis Publicis a Conyers Middleton, S. T. P. Aca-
demiæ Cantabrigiensis Protobibliothecario &
Lectore ibidem Woodwardiano.

11

ORATIO

DE

Physiologiæ Explicandæ

MUNERE,

EX

Celeberrimi WOODWARDI Testamento

INSTITUTO:

Habita CANTABRIGIÆ in Scholis Publicis

A CAROLO MASON, A.M. Coll. S.S. Trin. Soc.,

Et Lectore WOODWARDIANO.

CANTABRIGIÆ,

Impensis GUL. THURLBURN, Bibliopol. Cantabrigienfis.
Prostant apud J. J. & P. KNAPTON, GUL. INNYS &
R. MANBY, & CAR. RIVINGTON, Bibliopolas Londi-
nenfes. MDCCXXXIV.

Digitized by the Internet Archive
in 2019 with funding from
Wellcome Library

<https://archive.org/details/b30779091>

O R A T I O

D E

Physiologiae Explicandae

M U N E R E, &c.

CUM tot egregios viros omni literarum genere florentes, dicendi facultate et exercitatione ornatissimos, tantam ingenuorum juvenum coronam, omniumque ordinum frequentiam hodie convenisse video; est quidem quod WOODWARDI memoriae hunc tantum honorem gratuler, ipse interea animo non parum perturbatus, qui in nova hac Provincia suscipienda oratione vos solenni, orator omnino novus minimèque exercitatus, sum excepturus; sed me recreat aliquantum reficitque, quod vos, Academici, non magis acres et eruditos iudices quam candidos et humanos esse cognoverim: Hac igitur fiducia potius fretus, quam quod ex-

B

pectationi

pectationi vestræ me satisfacere posse speraverim, novum hoc nostrum munus obire non reformidabo. Cultum vero & perpolitum dicendi genus in dissertationibus philosophicis ne expectetis, Academici; hic enim, non verborum lenociniis sed perspicuitate, non sententiarum elegantia et ornatu, sed argumentorum vi et pondere, res agenda est; verba nova, horrida, et Latinis auribus prorsus incognita, audienda sunt: Res ipsa ornari non vult; neque, si ornatum admitteret, eum me esse profiteor qui adhibere possum.

Cum vetus laudabilisque consuetudo apud omnes fere gentes prævaluerit, ut illi viri, qui vel literis vel armis floruerint, vel artes novas in usum publicum protulerint, vel quocunque modo de genere humano bene meruerint, laudibus et honoribus debitis, quandoque etiam divinis, cumularentur; quo scilicet gratum erga benefactores animum testarentur, et alii hujusmodi honoribus stimulati, virtutes, quibus parti erant, imitarentur: Officii nostri ratio postulare videtur, ut prius ad laudes WOODWARDI prædicandas, quam ad philosophiam ejus explicandam, me accingerem.

Unde

Unde enim dicendi exordium, potius quam ab illo cui ipsa dicendi occasio debetur, petendum est? Præsertim cum ille tam amplam veræ laudis materiem reliquerit, ut mentitos fictosque colores respuat prorsus, et sola simplicique veritate, mode digne proferatur, ornari velit.

Et profecto de insigni ejus in medicina successu et *φιλανθρωπία*, de tanta ejus in omnibus fere scientiis, in omni literarum genere peritia, nullo disciplinæ Academicæ adjumento, sed proprio Marte acquisita; de tanta demum apud exterarum gentes fama et honore, amplissimus dicendi campus mihi pateret, nisi nupera et elegantissima, ex hoc ipso loco habita oratio, hanc anam mihi prorsus præripuisset.

Inerant sane in illo viro summa erga omnes Comitas et Humanitas, in veritate investiganda absque præjudicio Diligentia mira et Sagacitas, in scribendo perspicua et amabilis Simplicitas, in disputando Gravitas et Modestia; quarum omnium in scriptis suis ampla satis testimonia reliquit,

quit, longe plura et majora relicturus, nisi pudor malus prohibuisset: Maximam enim observationum suarum et scriptorum partem flammis perire voluit; quam jacturam multorum hominum industria vix et ne vix tandem aliquando supplebit.

Hæc vero cum futuris dissertationibus materiam præbebunt, in præsens omittam; Causam, quæ illum ad hanc potissimum philosophiæ partem colendam impulit, et ad nos tanta derivavit commoda, explicaturus.

WOOWARDUS igitur, cum animum ad philosophiam applicuisset, umbratilem illam et nugacem scholasticorum philosophandi methodum aspernatus, et vestigiis maximorum virorum, Verulami, Boylei, Newtoni insistens, et veram solidamque philosophiam, non nisi longa observationum et experimentorum serie inniti posse expertus, eam hac omnino via sibi colendam esse statuit. Ne vero vel actum agere, vel alienâ scrip-
 tia compilasse videretur, in illa philosophiæ parte quæ labores aliorum aut effugerit aut eluserit, quæque

quæque curam et industriam maxime postularet, sibi laborandum esse duxit:

Hodiernum igitur Philosophiæ statum et progressum animo complexus atque perscrutatus, vidit Mathesin tum mixtam tum abstractam & Astronomiam, a multis acutissimisque viris ad maximam fere maturitatem perductas esse. Cum tamen horum pars magna in quantitatibus mensurandis, in rationibus obscuris componendis et elucidandis occuparentur; Alii, planetarum motus diligentissime observantes, periodos illorum numeris constringerent; Alii de lacubus et montibus, imo de animalibus ibidem existentibus, controversias moverent; Alii demum cometas eorumque caudas, si non oculorum acie, at mentis tamen, in longinquas regiones prosequerentur:

Indoluit tandem vir clarissimus, telluris nostræ, humani generis domicilii, cognitionem, ab his omnibus prorsus fere neglectam, jacuisse: Juvenum ad instar nostratium quorundam, qui quamprimum ferulæ manum subduxerint, ad oras statim peregrinas advolant, mores scilicet, urbes,

consuetudines hominum observaturi, disciplinæ interim Academicæ, Historiæ, Geographiæ, Πολιτείας, et Religionis Anglicanæ prorsus imperiti.

Vidit etiam Physicas rerum causas a novis et verissimis principiis deductas esse; Mechanicam, Chemiam et Pneumaticam, arte et industria maxima aut inventas aut promotas; Anatomorum multa esse et egregia *ἀγέματα*; Medicinam ipso librorum numero laborantem et pæne obrutam.

In Historia Naturali multos magnosque viros labores suos posuisse: In re Botannica, præter alios multos, Morrifonum, Clusios, Bauhinos, et supra omnes nostratem Raium:] In Animalium Historia, Moufettum, Johnsonum, Rondeletium, Aldrovandum, aliosque; magna sane nomina, et in republica literaria semper memoranda. Horum vero plerique in obviis tantum phænomenis et in cortice, ut ita dicam, terrena hærebant; internam ejus constitutionem et quasi medullam attigerunt pauci.

Et

Et ex iis qui Terræ ipsius naturam et fabricam, quæque intus in venis occlusa et abscondita contineret, explicarunt; de Metallis, de Mineralibus, de Gemmis et Lapidibus, de omni denique Re Fossili plerique conjecturas tantum suas nobis reliquerunt. Nonnulli generale quoddam systema tradentes, non rerum ipsarum vires indagando et experiundo, non earum statum, situm, atque dispositionem observando, sed Hypothesibus in musæis suis excogitatis indulgendo, pro vera natura figmenta mera, pro solida philosophia fabulas quasdam philosophicas, stilo fane ornatissimas, Theoriarum nomine nobis venditant, contra notissimas naturæ leges, et obvia quæque phænomena miserrime pecantes.

Alii, Peripateticorum more naturam proprietatesque rerum explicaturi, quatuor sibi sumunt elementa, ex certa quorum mistura una cum certo humiditatis et siccitatis gradu omnia componunt; omne illud terrenum quod undique cernimus et tangimus, proprietatibus utcunque diversis aut oppositis præditum, pro simplici elemento habentes;

bentes; cum recentiorum Philosophorum sagacissimi, post accuratissima habita scrutinia, Elementa simplicia neque nobis exhibere, neque quænam sint explicare vel concipere ipsi possint.

Alii, cum altius quiddam sapere videri volunt, atque rerum omnium phænomena causasque ultra quam intellectus humanus patitur, explicare cupiunt, vires quasdam obscuras futilesque Hypotheses sibi fingunt, quibus omnia accommodant; et, ne causas occultas induxisse videantur, nova cudunt nomina, et inania verba nobis obtrudunt, per quæ quid velint ipsi nesciunt; rebus scilicet, de quibus philosophantur, aut obiter tantum aut non omnino inspectis; hi tamen Mystæ, si Diis placet, naturæ, in intimos ejus recessus se penetrare gloriantur, et arcana maxime recondita recludere.

Quod ad eos attinet qui aut de fossilibus in genere tractarunt, aut ea sola, quæ Regionum quarundam propria sunt, in historiis suis naturalibus (quasi in transcurso) attigerunt, (exceptis Stenone et Agricola, cum paucis aliis) necessarios rerum

rerum characteres ex genere, qualitate et ortu
 cujusque petitos, aut non omnino, aut male de-
 scripserunt, novisque itidem nominibus rebus
 pro arbitrio impositis effectum est, ut in diversis
 Autoribus res eædem diversis nominibus, et di-
 versæ iisdem appellentur. Frustra itaque erimus
 si in hujusmodi commatis scriptoribus Ordinem
 et Methodum requiramus; nam si qui in Classes
 quasdam rem fossilem redigere conati sunt, in
 fictitias prorsus et, ut ita dicam, nominales id
 tantum factum est: Nam quid aliud sonant Fos-
 filia rara et vulgaria, pretiosa et vilia, cœlestia,
 terrestria et aquatica, sacra et profana, utilia
 denique et non utilia, *καταγίω* omni naturali
 plerumque neglecto? In rerum porro definitio-
 nibus et descriptionibus tradendis, hisce auctori-
 bus hoc fere semper solenne, ut si quam virtu-
 tem medicinalem rei cuiquam attribui, vel ex
 aliorum scriptis vel ex anilibus quibusdam fa-
 bulis fando unquam audiverint, hac eam statim
 ornent atque investiant. Neque raro evenit ut
 de rerum quarundam forma et virtute inter se dis-
 crepent atque digradientur, cum de ipsa rerum
 existentia nondum constet.

Sed ut Scriptorum de his rebus recensitionem tandem aliquando finiam, nonnulli fuerunt et etiamnum sunt, viri sane ingeniosissimi et omnimoda fere doctrina exculti, qui tamen prejudiciis nescio quibus in Mosaicam de diluvio historiam abrepti, rerum omnium Parentem, Naturam, quæ nihil frustra agit, non simplicem et sibi semper constantem, non providam et solertem, non denique via et ratione in omnibus operibus suis progredientem ; sed ludibundam sed jocantem in scenam introduxere.

Hæc igitur et hujusmodi plura cum observasset sagacissimus WOODWARDUS, hanc Historiæ Naturalis partem, si non prorsus neglectam, at saltem minime excultam, in se suscepit, eamque summa Industria, magno Ingenio, maximis impensis excoluit feliciter et promovit. Cum vero hanc Provinciam, ob Novitatem et Amplitudinem, utpote quæ tantam et tam reconditam Naturæ partem complectitur, majorem esse senserit, quam quæ ab uno quovis homine, ab aliis licet studiis prorsus vacuo, multo minus variis
et

et assiduis negotiis impedito, ad perfectionem aliqualem perducere posset: multorum hominum diligentiam, longam Observationum Experimentorum et Annorum seriem, necessarias esse iudicavit, et in auxilium sibi vocare statuit.

Hoc ut melius efficeret Vir Optimus, insignem illam rerum fossilium suppellectilem, quam ipse tanto labore et sumptu in hujus rei adjumentum comparaverat, posteritati sacram esse voluit: Et ne dissiparetur aliquando et periret, in hanc Musarum sedes migrare iussit; ubi scilicet vigilantissime custodiretur, ita tamen custodiretur, ut facilis ad has opes et quotidianus aditus omnibus pateret, qui hujusmodi studia promovere et possint et velint.

Egregii ergo hujus viri magnam erga vos benignitatem, magnam de vestra fide, de studiis vestris opinionem agnoscite, Academici; Qui hunc rerum naturalium Thesaurum, non ornamento solum et honori, sed usui etiam et emolumento vobis esse voluit; Qui Lecturam insuper stipendio satis amplo cohonestavit; mercedem

non contemnendam annuis Inspectoribus assignavit ; et in Experimenta facienda, in suppellectilis suæ Augmentum, in Epistolicum cum viris literatis Commmercium, sumptus necessarios suppeditavit ; Qui Vos denique residui, quod exactis rationibus quotannis superesset, hæredes suos constituit.

Tantam erga nostram Rempublicam Benevolentiam et Liberalitatem hominis nullo Institutionis Academicæ vinculo nobis astricti, nunc præsertim dierum, quis non miretur ? quis non maxime laudandas existimet ?

Vestram erga Eum Pietatem gratumque animi affectum agnosco Academici, qui nomen ejus inter summos Patronos et Benefactores vestros recitandum esse unanimi consensu nuper decrevistis. Tanti igitur viri nomen tamdiu apud nos in honore erit, quamdiu vel veræ Philosophiæ cultus et bonarum literarum amor manebit, vel grata atque pia Benefactorum commemoratio celebrabitur ; nisi forsan, quod avertat Deus, vera et solida hæc philosophandi ratio inter nos in defuetudinem abeat ; vel in obscuram istam et
nugacem

nugacem Scholasticorum disceptationem, inanes verborum ventilationes, et fomniculosa deliramenta tandem aliquando relabamur.

Neque major erat WOODWARDI in has Musarum sedes Benevolentia et ad veram promovendam philosophiam Liberalitas, quam in providendo ne quid de sua intentione intercideret Sagacitas, (dicam?) seu potius Felicitas, Qui tales tantosq; viros Testamenti sui Executores elegerit: Quorum in Laudibus efferendis cum merito multus esse possim, auribus tamen vestris et Illorum Pudori in præsens parcam. Summam autem illorum erga Academiam nostram Benevolentiam, erga Testatorem Pietatem nullo modo præterire possum; neque de WOODWARDI meritis detrahere videar, si id, quod compertum habeo, proferam: Eum, scilicet, haud magis proprio motu, quam illorum suasu et hortatu, has potissimum sedes elegisse, quas thecis suis maxima rerum fossilium copia et philosophandi materie refertis ornaret, & bonis suis fere omnibus cohonestaret.

Sive

Sive illorum virorum in mortui bonis quacunque disperfis, colligendis et dividendis Laborem atque Fidem; five in Possessionibus idoneis investigandis et coemendis Diligentiam, iisque omni Legum forma munitis, propriis insuper sumptibus non parum auctis, quam celerrime in manus vestras tradendis, (cum liceret interim iis fructus intermedios in proprium usum convertisse) Integritatem intueamur; Eos qui summis ornarentur præconiis dignissimos esse nemo non confitebitur.

Neque hic se sistit illorum erga Testatorem Pietas. Cum enim animadverterent, nescio quo temporum fato, ita sæpe evenisse, ut quo honestiore stipendio ornarentur Lectores, eo minorem in Officio suo obeundo diligentiam adhiberent: Huic malo quam primum occurrendum esse judicarunt, atque idcirco inter decreta nuperime retulerunt, ut quantum officio suo deesset Lector, tantum de assignato stipendio detraheretur; ut siquando in defuetudinem Lectura hæc abiret, id non nisi sero et per vestram

stram demum Indulgentiam seu potius Negligentiam eveniret.

Hæc de ornatissimis hisce viris, utpote ad nos spectantia, taceri a me non poterant, cum longe plura longeque majora dicenda restant: Sive enim illorum in Amicitiiis colendis Constantiam, in Rempublicam Amorem, in Ecclesiam Pietatem, in omni denique re et officio Virtutem & Integritatem conspiciamus, tales omnino reperientur, quibus ad bonorum omnium amorem erga se conciliandum nihil deest, nisi ut cognoscantur.

De prorsus ignotis tamen non loquor; neque opus est ut in memoriam vestram revocarem, unum ex his a Senatu Academico, idque potentiorum votis, precibus minisque contrahentibus, præ omnibus toties missum fuisse ut in publicis regni comitiis res vestras *præsens* procuraret. ----- Sed nunc non est his locus: aliquem enim ex subfelliis susurrantem audire videor;

*Non tali auxilio, non defensoribus istis
Tempus eget.
Tempora mutantur.*

De

De his igitur plura non dicam, non tam quod in aliorum Invidiam ea dicta esse, neque quod me non ex animo et veris illorum meritis, sed *grato affectu* et officii ratione ductum hæc protulisse nonnulli existimare poterint, quam quod Laudum suarum præconia, verissima licet, Illorum aures fat scio non lubenter esse admissuras.

Hoc enim egregium in se summa virtus habet, ut non tam recte factorum laudem et gloriam, quam ipsa recte facta prosequatur ; neque superbiam meritis quæsitam sibi sumat, sed mente recti conscia contenta reliqua contemnat, aut saltem minime aucupetur.

Ad Philosophiam et Collectionem Woodwardianam jam se converteret Oratio nostra, quem scilicet sibi finem proposuit, quæ qualiaque in se continet expositura, ni Patientia vestra jamdudum me nimis abusum esse existimarem. Objectionibus igitur nonnullis solummodo nunc breviter occurram, et de horum Studiorum usu pauca subjungam.

Dicunt

Dicunt quidam, Quid sibi velit hic tantus nugarum, rerumque pedibus ubique conculcatarum apparatus? Quorsum tanta Lapidum, Arenarum, Mineralium, Concharum, aliarumque rerum, quæ nec pretium nec pulchritudinem habent, Collectio?----- Non (inquam) ad Delicatarum oculos delectandos, non ad crumenas Avarorum implendas; sed ad veram Philosophiam excolendam, ad fictas rerum Virtutes Proprietatesque refellendas, ad novas verasque detegendas, ad res ipsas in naturales quasdam classes et ad genuinam originem reducendas, ad interiores Naturæ processus investigandos, ad fidem denique Sacris Scriptoribus adstruendam, et argumenta contra Atheos et Deistas stabilienda. Hoc enim semper in animum induxi meum, nihil a Summo rerum Parente creatum esse, quod Observatione et Contemplatione humana esset indignum: Quippe nihil est tam tritum, tam vulgare unde Dei Existentia demonstrari non potest.

Vix autem magis discrepant inter se hominum Ora, quam Ingenia atque Studia; quod laudat ille

contemnit alter ; quod huic maxime placet illi nauseam movet ; suum cuique bonum, sua Voluptas eligitur, aut ab Institutione, Ufu et Præjudicio pendet et derivatur ; ita ut non magis Fortunæ suæ, quam Voluptatis, quisque sit faber ; sed revera ita comparata est gens humana ut vix sit res novas audiendi, quam censuris eas cumulandi magis avida : Hinc sæpe evenit ut ea quæ contemnuntur sint etiam ignota aut parum perspecta ; Plurimique, ut in sua sibi plaudant Ignorantia, pulchre se egisse opinantur, si ea quasi vana et inutilia traducant, ad quorum cognitionem assequendam vel Ingenium iis, vel Industria et Patientia deerat. Derisui erant olim qui Antipodes credebant. Terram immobilem esse multi haud dudum contendebant (si non etiam adhuc contendunt) et contra sentientes quasi deliros irridebant, vel pro hæreticis damnabant.

Multa præclara, et humano generi utilissima, casu quodam inventa fuisse confitendum est, tentando vero et experiundo longe plura.

Abſque hoc philoſophandi genere Artibus et Scientiis multis, Utilitatibus et Delectamentis plurimis, Medicinis optimis caruiſſemus.

Abſque hoc litora adhuc legerent Navigatores, in altum contendere nequaquam auſi; aut potius non omnino vel navigia vel domicilia ædificaffent; ſed nec Agros araffent homines, Metallorum uſum, Ferri præcipue, neſcientes: Cum Americanis forſan plumis etiam adhuc conchiſque ornati ſuperbirent, glandibuſque veſcerentur: Concharum fragmenta vel lapides duriffimos diu inter ſe collidendo et fricando Inſtrumenta ſibi conficerent, quibus ad uſus Mechanicos, ad Utenſilia qualia qualia conficienda, diuturno cum labore et faſtidio uterentur.

Ut finem tandem aliquando faciam: ex nobiliſſimi hoc WOODWARDI Beneficio novæ ſunt ſperandæ Artium Utilium Inventiones, novæ rerum Virtutes et Relationes, non idcirco negligendæ quod ad humanum uſum non ſtatim applicentur. Diu latuit Pyxidis Nauticæ uſus
poſt

post cognitam inter Ferrum et Magnetem Attractionem. Mirifica illa, atque olim incredibilis, quam nuper experimentis compertam habemus, Vis Electrica, in varios forsan usus posteritati cedit, Magnetis ipsius non ignobiliores.

Me quod attinet, hoc tantum addam, cum Provinciam hanc mihi demandarunt Viri Optimi ; Sermonis Elegantia ornatumque dicendi genus utcunque in me desideretur ; in ea tamen administranda, in vero Fundatoris Consilio et Instituto prosequendo, et re naturali pro facultatibus nostris promovenda, Diligentia saltem non desiderabitur.

F I N I S.

THE UNIVERSITY OF

CHICAGO

LIBRARY
OF THE
UNIVERSITY OF
CHICAGO
1887

CHICAGO
COLLEGE
1887

Imprimatur

Oratio hæc Laudatoria.

Samuel Collins, Pro-præses.

Thomas Burrell,

Rich. Torlesse,

Will. Dawes,

Tho. Gill,

} *Censores.*

Datum ex Ædibus

Collegii nostri

Sept. 27. 1697.

ORATIO
LAUDATORIA,

In Ædibus

Collegii Regalis Med. Lond.

17^{mo}. die Septembris.

HABITA

A SAM. GARTH,

Col. Reg. Med. Lond. Soc.

LONDINI,

Impensis *Abelis Roper*, apud insigne Nigri Pueri,
in vico vulgo vocato *Fleet-street*, MDCXCVII.

ОУТАЯС

АИРОТЕН

and I hope to see you

155 N. 3rd St.

St. Louis, Mo.

Yours truly,

Wm. H. Hunt

Viro Amplissimo, Ornatissimo,
CAROLO MONTAGUE,
Societatis Reg. Præsidi Eruditissimo.
Ærarii Quæstori Primario.
Fisci Regii Cancellario.
Serenissimo Principi
GULIELMO Magno
à Secretioribus Consiliis.
Et Orbis Britannici deliciis, &
fælicitati.

Hoc obsequii, &
Observantiæ pignus
quàm humillimè offert,

B

S. G.

THE UNIVERSITY OF CHICAGO
CARLO MONTAGU

1912-1913

James Gustafson

1912-1913

James Gustafson

GOVERNMENT

James Gustafson

James Gustafson

James Gustafson

James Gustafson

James Gustafson

James Gustafson

James Gustafson

James Gustafson

Clarissime PRO-PRÆSES,

Collegæ Doctissimi.

Auditores humanissimi!

MIrentur alii, neque id fortè injuriâ, cum tot adsint Oratores, ingenio pariter & eloquentiâ illustres; me, qui neque doctrinâ neque arte dicendi polleam, provinciam hanc inauspicatò sortiri: Verum hoc quicquid est, sive honoris, sive muneris, non ambitu quæsitum est ac ne minimâ meâ propensione susceptum; sed cum jubente Præside, reluctari nefas esse duxerim, estimationi potius & famæ propriæ, quàm officio dedesse constitui; ne fortè videar non satis authoritati ejus auscultasse, cujus ipso etiam in hortatu acquiescere debemus. Nec incepti mei me pæniteret, si tanti viri vestigiis insistere possem: Qui, quot ha-
bet.

bet verba, tot illecebris leporibusque abundat. Suavitate suâ permulcet, subtilitate docet, argumentis flectit, & varietate delectat; nervosâ insuper *Sallustii* brevitatem pollet, *Curtii* acumine, & numerosâ *Tullii*, quoties ita visum est, & diffusâ venâ. Nemo igitur *Millingtonum*, ut par est, nisi qui par ingenium sortitus est, laudare moliatur; quàm impar autem & ineptus ego fuerim, Oratione hodiernâ abundè constabit.

Desunt certè mihi & æquabile dicendi genus, & vis suasoria; neque pressè loqui scio, neque uberiorè, inventio mea jejuna est & sterilis, gestus denique rudis & incompositus. Quid igitur præsentia vestra, quid arte nostrâ dignum proferam? Non vos latet *Alexandrum* magnum (ut de *Zoroastre*, de *Mithridate*, de *Lysimacho* sileam) haud minimam medicinæ, idque *Stagyritæ* consilio, dedisse operam. Nec mirum, cùm veneranda antiquitas, quamplurimos medendi arte felices, non solum privilegiis, non præmiis, non statuis, sed reverentiâ planè religiosâ, sed cultu prorsus divino dignos existimaverit: Homines enim ad deos nullâ re propius accedunt, quàm sanitatem dando, conservando, restituendo.

Flammam febrium ferocientem restinguit Medicina, artus paralyticos & rigentes, benignis ignibus refocillat,

refocillat, Hydropis laticem exantlat, renum scaturiginem sistit, vultum squallore morbido fædatum decorat, & larvam tollit, tabidos instaurat, plûs justò saginatos redigit, torpidos irradiat, & insomnes consopit. Plantarum figuras & sapes pene infinitos distinguit, medullam fossilium intimam rimatur, naturam per mille Orbes & Mæandros sectatur, ipsissimum insuper terræ centrum, medicinæ perspicacitatem non fugit, nec quicquam in ipso delitescit Oceano.

Plura dicerem ut artis Apollineæ laudibus nequaquam deessem, verùm ista omitto, ne multa hac occasione non ita pridem audita recensere videar. De medicorum itaque dignitate & titulis, qui certiores fieri velint, *Foesium* & alios consulant. Sed in ea nos incidimus loca & tempora, quibus ipsa ægrotat medicina. Ars siquidem omnibus aliis utilissima, sibi suisque prodesse nescit, dùm plus Pseudo-medicis quam morbis laborat Anglia. Quot & quales sint isti, programmata parietibus affixa monent indies. Hic circumforaneus in plateis equo insidens, dentes evellit; Ille, domi certis horis fatuos expectat; Alter Matulas inspicit, & ubi morbum non invenit, facit; Alter, turbâ in unum Funambuli ope convocatâ, venit, videt, in confertissimam catervam irruit, & horrendam edit stragem. Non autem telis vulnerat ista Agyrtarum colluvies,

C

sed

sed Theriacâ quadam magis perniciosâ, non pyrio, sed pulvere nescio quo exotico certat, non globulis plumbeis, sed pilulis æque lethalibus interficit. O genus hominum, si quod aliud sceleratissimum! totam urbem invadunt isti Homicidæ, sed an imperitiâ an impunitate majori incertum; pro pudore, audacia, pro sagacitate inscitia, pro integritate improbitas hodiè, ut olim, viget. Huic pesti ut occurreret *Henricus* octavus regum augustissimus, & sanitati subditorum religiosè consulens, Collegium hoc quamplurimis immunitatibus ad rem medicam moderandam stabiliendamque donavit. *Henrici* ad exemplum *Edvardus* sextus, *Maria* & *Elisabetha* Regina, *Jacobi*, *Carolique* duo, nullum officii genus ad emolumentum nostrum spectans, omisere: Multa insuper *Mariæ* & *Arabellæ Stuartæ* ex regio sanguine oriundis debemus; *Lumleio* Baroni, summæ, eo tempore, authoritatis etiam multa; Nec minora Marchioni *Dorcestriæ*, Collegii hujusce regalis Socio, viro etiam animi dotibus quàm natalium splendore clariori. Neque nos fugiant Societatis nostræ & alia ornamenta, *Linacrus* nempe *Atkinsius*, *Readus*, *Meverellus*, *Foxus*, *Gulstonus*, *Pagettus*, *Bidgodsius*, *Pamannus*, præcipuè vero *Harvæus* & *Hameus*: ingenti virtute & doctrinâ fuere ambo, sed indole paulum diversâ: *Harvæus* benignitate clarus habebatur, Morum simplicitate *Hameus*: Ille humanitate festivâ probatus fuit, Huic augusta gravi-

tas dignitatem dedit ; Alterius lenitas, alterius stabilitas celebratur.

Quanti quidem *Harvæum* facere debemus non tam ex ore nostro quam scriptis ejus discat *Europa*. Efflorescet indies beati Senis fama, quo doctiorem, nulla ætas vidit, nulla forsitan videbit : Cujus ingenii acumen atque ardor mentis, tanquam flamma quædam cælitus delapsa, totum Orbem literatum illustravit. Falsa pro veris olim recepta tenebris damnavit, latentia & abscondita in lucem protulit ; ipsissimam animalium originem, sudore majori nescio an sagacitate, indagavit, æstum sanguinis feliciter observavit, motumque reciprocum palam fecit ; nihil illum latuit, nemo virtutis simul & veritatis studiosior ; tanta fuit Illi benevolentia, ut nihil sciverit quod alios nescire voluerit ; tanta Eruditio ut nemo ex eâ ad hanc fere diem sciverit quod Ille ignoravit : ad Hæc, qualis in vultu facilitas, in verbis candor, in familiari consuetudine lepor & venustas ! Erga Collegas urbanitate, erga amicos constantiâ, erga pauperes charitate, erga omnes probitate inclaruit. Deorum immortalium ad instar paucissimis indiguit, & quamplurimis benefecit, etiam posteris, non solum divina edocendo, sed nos omnes Hæredes ex asse constituendo.

Haud

Haud longe aliter *Hamaus*. Illius quidem munificentia effectum est, ut Collegium hodie supersit; quantis quidem impensis ædes hæc, sæviente bello plusquam civili, vindicaverit, neminem latere existimo. Esse quàm videri munificus malebat: Alii munera, alii agros, alii statuas, alii alia exoptant, & optando consenescent. Hic de nihilo nisi mentem sanam & corpore sano sollicitus erat, Cujus amicitia dum vixit, nunc charissima nobis est memoria & longum colenda.

Neque *Cutlerum* Baronettum, præterire licet. Si filerem Ego, me monerent hi parietes, hæc subsellia. Vir sanè neque alieni injuste appetens, neque sui profusus; haud plus honesta expetiit, quam male parta devitavit; omnia sibi negavit, uti multa aliis elargiretur, fame & frigore se fere conficiens, uti Egenos victu & igne reficeret; publica curavit, neque interim propria neglexit: plura dicere decorum non est, neque fas, pauciora: Filiam diù Illi non superstitem reliquit, optimis animi ornamentis dotatam, & Illustrissimo Comiti de *Radnor*, prosapia insigni, virtute vero insigniori, Connubio junctam.

Restant & adhuc nonnulli Benefactores qui in vivis sunt. Domina nempe *Gratia Pierrepont*, dotium pater-

paternarum nobilium hæres nobilissima : *Henricus Guy* Armiger, vir non minus humani ingenii, quam ad largiendum promptissimi, qui cum *Gulielmo Langham* & *Johanne Banks* Baronettis, integritate & consilio probatis, digni sunt ut commemorentur.

Ad te nunc Coronidis loco convertimur, Gulielme Auguste, Regum invictissime, non tam Collegii hujusce Jupiter Stator & Custos, quàm Orbis Christiani liberator & publicæ quietis restitutor. Quòd regna Europæa meliora expectant, Tuum est ; quod Agricolaë tempestates anni lætas sperant, Tuum est ; quod castitatem matres, quod pudorem filiaë jam tuentur, Tuum est. Te venerantur Angli, Te observant Hispani, Te mirantur Germani, Te colunt Batavi, & Te verentur Galli. Si gesta Majorum tuorum illustria, si genus antiquum spectemus, ecquid non veteres loquuntur Fasti & Annales ? Tot Principes & Heroas è stirpe Nassoviâ oriundos numeremus, quot vix homines è suâ possunt alii.

D

Ignorat

Ignorat Nemo, nisi qui nescire mallet, vim Gallicam viginti, & eò ampliùs retro annis, toti Europæ tremendam incubuisse. Belli enim desuetudo socordiam, socordia servitutem sæpius parit, adeò ut de libertate publica desperandum esset, ni juvenis Auriacus, Majorum more, venienti morbo occurrere festinasset. Quæ & quanta plane stupenda in Flandris gessisti, testatur inter alia prælium Montibus dimicatum, ubi hostilem exercitum penitus fudisti, ubi militarem Divi Julii scientiam, Alexandri annos nondum prætergressus, implevisti, Tu penè impubis & jam Triumphator.

Te de novo conservatorem petiit concussa salus publica, & in sinum tuum confugit suspirans Anglia; Non te, propria ambitio Imperatorem fecit, sed nostræ angustiae: Britanniam languentem, & extrema jam perpressam, vel ipsâ præsentia tuâ restitui-

tuisti,

tuisti, Hiberniam ferè exanimem, adventu tuo refocillasti. Si insignium virtutis tuæ exemplorum immemor essem, Boina flumen me admoneret. Alveum fere deseruit cunctabundus ille amnis ut trajetui tuo indulgeret; traducis copias flumen, ordines deinde instruis, Legiones disponis, res ad manus venit; Ipse in prima acie stas inconcussus; non diu utrinque decertatum est, quin hostes, qui situs & opportunitates locorum apprimè calluere, impetum tuum non sustinentes, fugâ sibi consulere cæperunt. Fugientes insequeris, & quocunque tendis, Te comitatur Victoria.

Cohortibus tuis nullus aditus vel est asper, vel arduus; subsidunt montes, exarescunt flumina, patent januæ, & armis tuis cedit tota insula. Barbaris & Gallis hoc modo subactis, quò Te fata trahunt, & gloria tua, vocaris; Flandriam denuo tot incendiis, vastatam, tot Gallici furoris indiciiis pessundatam revisis,

revisis, patrocinium promittis, & lugenda rerum sorti benignè succurris. Mænia Namurci petis; milites, quo jubes, sequuntur alacres, & castris positis, oppidum obsidione premis. Galli, spe multâ in copiis & propugnaculis constitutâ, inceptum irrident. Nostri verò pristinae virtutis memores, acriter & omni impetu obsessos adoriuntur; Teque auspice, & Teste Francorum exercitu, Castrum totius Europæ munitissimum, expugnant.

Quis & quantus Ille dies, si tacerem Ego, Columnæ, Arcus triumphales, Obelisci, brevi eloquerentur. Ecquid est Auguste, quod pro utilitate publicâ, non molireris? cum Coclitæ natares, cum Fabio cunctareris, & cum Manlio contra hostium agmina, solus licet, decertares. Non prosperis, supra quàm Majestati convenit, elatus es, neque rebus sinistris infractus; Sed si à Tuis in prælio derelictus fores, Uno animo, sed forti, sed magnifico,

nifico, universos sustinere quum non posses, singulos vinceret.

Cæli inclementiam, ventorum impetum, Oceani furorem, hiemem & æstatem juxta perpeti dignaris. Prælium ut primus inis, sic ab eodem ultimus desistis: Dii interim immortales, Te melius, quam ipse soles, curent, ne nimium audendo, crudelis sis in eos quos servasti; præsertim cum ex tuâ unius fortitudine & prudentiâ, tot populorum salus, tot Principum securitas pendere videatur. Si jubes esse fœlices, sumus: Non tuos, ut alii reges, deprimis, sed demulces, sed attollis; neque vis tibi plura licere, quàm nobis omnibus, Tu solus Tuimet Victor. Te eheu! teipsum vincere potuisse, luctuosâ occasione constabat, quum Maria Augusta, quâ nulla ore amabilior, alloquio suavior terras reliquit. Emicuere in reginæ gestu, in fronte, in oculis, Majestas, candor, veneres, & quicquid delectationem & cultum unâ conciliaret.

E

Si

Si Octavius Augustus, si Germanicus, si Trajanus, Liviam, Agrippinam, Plotinam jactaverint, ecquid de Heroinâ nostrâ non eloquerentur omnes? sed stillantes passim oculi, virtutes Illius cælestes fortius nuperrimè enunciârunt.

Ipse quidem, Dive Gulielme, die istâc à lachrymis non temperasti, sed postquam Te esse Conjugem amantissimum probâsti, Te esse Heroem etiam meministi. Rebus Britannicis denuò invigilas, & negotia publica solus sustines, neque magis patriam armis tutaris, quam tuo ornas exemplo.

Ne miretur aliquis me finem collaudandi ignorare, quum Tu finem mira præstandi nescias; sed in hoc minus stupenda sunt, quia Tua. Monetam nostram diminutam & adulterinam invenisti, probam (sed serò sit utinam) relinques. Britanni etiam
sub

sub adventum tuum, molles & enerves, nil hodie, Cæsare duce, nisi victoriam spirant, nil nisi turpem famam metuunt. Dies me ante deficeret, quam gesta tua percurrerem, & qui tota recensere velit, quos Tu emeraris annos, habeat necesse est.

Talia de Hercule, de Scipione, de Marcello finguntur, sed de Te vel Majora certa sunt. Fama profectò tua usque adeo se diffudit, ubique gentium sic inclauit, ut bellicosus Ille Russiæ Imperator, gestorum æmulus, & nominis tui cultor, Te visendi gratiâ, ab ultimo Septentrione venerit; tuo malens frui hospitio, tuas virtutes heroicas mirari, quam dignitatem Imperatoriam exercere, & qui eum dominant triumphos, de Turcis Tartarisque debellatis, agere; & mox cùm eum Tu, Prometheus alter, igne cælesti animaveris, Tuo afflatus Genio, tuo numine plenus, ad implenda Græcorum vota & vaticinia redibit

dibit , Imperium Orientale auspicaturus.
 Regna interim hæc usque ad invidiam
 sub auspiciis tuis efflorescunt, qui tam Op-
 timi Regis, quam Maximi Ducis omnes nu-
 meros implexisti. Reliqua insuper Europa,
 quin, & ipsa Gallia, tam longis belli in-
 fortunis vexata, ad Regiam tuam Lega-
 tos mittunt, & finem miseriarum expetunt.
 Precibus eorum annuens, ut Jupiter olim,
 nutu tuo Orbem pacâsti. Nunc silent li-
 tui, nunc rubiginem trahunt arma, nunc
 redeunt sæcula ut olim aurea, conquies-
 cunt Cives, nec hostium incursionibus di-
 vexantur Coloni. Desinamus tandem omnes
 querelarum, & trophæa tua unanimes con-
 cinamus, dum Te domum reducem, sellæ
 curuli insidentem, spoliis decoratum, tunicâ
 palmatâ, purpurâque indutum, lauro coro-
 natum, Captivorum agmine pone veniente,
 expectant regna tua; Galliâ denique in
 terminos proprios redactâ, Hispaniâ libera-
 tâ, Belgiâ in tuto positâ, & Aquilæ Ger-
 manicæ

manicæ alis ad Hungariæ fines expansis, Tibi ludos publicos instituemus, Teque Orbis Europæi vindicem, Te propugnatorem, Te Statorem grati nuncupabimus. Nec jactent Galli Regem suum dedisse Pacem, quam tot Urbium, tot Provinciarum redditione impetravit. Emit ergo sibi Pacem Ludovicus decimus quartus, dedit Gulielmus verè Magnus, idemque Christianissimus, Orbi Christiano.

Vix impetum hic reprimo, sed quoniam Princeps Optimus gesta sua reticeri, quam justis suorum præconiis recenseri mallet, & propriâ virtute, non alienis laudibus inclarescit, ad alia transibo; & vos omnes Collegæ orabo, ut in quantum Clementissimus totius terrarum Orbis Monarcha, regii hujus Collegii patrocinium suscepit, aliquid saltem tanto Patrono dignum moliamini. Præsidis optimi doctissimique, & quamplurimorum hujusce qui adsunt societatis, exempla satis præclara vobis propono; Illi enim angustiarum & calamitatum alienarum participes, Repositorium Pharmacis omnimodis probe instructum, in egenorum levamen poni curarunt. Si pietas itaque tanta, charitas tanta vos commovere

valeat, si non in cæteris, in hoc tamen conformes estote obsecro ; nisi eò ventum est, ut inimicos non solum foris, sed domi etiam inveniamus. Si statuta, si fides data, vana nomina sint, vestrà utcunque interest Collegæ, ne immunitates vestras vili faciant Isti, qui vobis subservire debent, sed ut privilegia quæ a Majoribus accepistis, posteris relinquatis. A vobis itaque obnixè peto, ut rursus in concordiam redeatis ; ut litibus inter nos compositis, Societatis nostræ emolumento unà consulamus.

Res, tempus, necessitas, magis quam Oratio mea vos hortentur. Nonne eò res devenit, ut nunc veremini eos, quibus vos decet esse terrori ; quibus honesta & inhonesta omnia pariter lucro sunt ; Qui eruditionis inopes, qui moribus inculti, qui omni posito pudore, ædes hasce funditus evertere satagunt ; Qui, quod spiramus, indignantur : sed licet discordiis nostris quam suis consiliis sint feliciores ; intelligant tamen nos fortiùs vigilare ad Collegii simul & populi salutem, quam ad perniciem Illi. Vos interim Collegæ (agant inter se Isti ut lubent) datæ fidei memores futuros spero. Plura dicerem si apud pertinaces valerent verba, nam ingenuis abundè dictum puto.

F I N I S.

ORATIO

CORAM

COLLEGIO REGALI

Medicorum Londinensium,

EX

INSTITUTO HARVEIANO,

HABITA

Festo Divi LUCÆ,


Anno Domini M.DCC.XXIX.

A PEIRCIO DOD, ejusdem Collegii Socio, &
Nosocomii Sancti Bartholomæi Medico.



LONDINI:

Impensis BERNARDI LINTOT, in Vico dicto
Fleet-street.



INSIGNISSIMO

Dom. *Hans Sloane* Baronett.

PRÆSIDII,

SOCIISQUE ORNATISSIMIS

Collegii Medicorum Londinens.

ORATIUNCULAM HANC

Ipforum Jussu Editam,

Eâ quâ par est Observantiâ,

D. D. D.

PEIRCIUS DOD.





O R A T I O

Die xviii Octobris, A. D. 1729.



U M mihi, nescio quo fato, incumbat ut orationem hanc apud Vos habeam, tum in laudem Artis nostræ, omnium quotquot sunt præstantissimæ, tum in memoriam & honorem eorum qui & de illâ, & de Societate hac nostrâ benè meruerunt; quàm arduam & perdifficilem aggressus sum provinciam, alii è vobis, *Auditores spectatissimi*, experiundo didicistis, alii conjecturâ facilè assequamini. Sistere se, atque suscipere se unum esse, de solenni aliquâ re audiendum, est magnum quoddam atque anceps ausum; præsertim cum nihil sit quod de illâ re dici possit quod non antea, & ornatissimè, & copiosissimè, dictum fuerit,

erit, & nemo ferè fit quin acutiùs, atque acriùs vitia in dicente, quam recta plerumque videat. Hanc itaque provinciam, utut aliis forsan optabilem, & certè honore plenam, mihi sanè formidabilem, deprecatus fueram, (id quod ab aliis Collegarum dignissimorum, faniore planè consilio, factum vidi) nisi quod nollem me subtrahere à quovis munere præstando quod mihi demandatum sit; & Tu, *Vir insignissime*, qui tantâ Tui famâ, & nostrum omnium commodo & honore Nobis nostrisque rebus dignissimè præes, me non inidoneum judicasti qui *Harvæi* magni instituto, magno hoc in conventu, aliquatenus satisfacerem.

Quâ ratione autem munus hoc absolvere entar, & vestræ de me conceptæ opinioni, quantum in me est, respondere, paucis accipite.

Primò itaque quædam proponam de Medicinâ in genere, deque iis quibus non modò originem & fundamenta, sed & omne id quicquid ferè est Artis nostræ saluberrimæ, debemus: Deindè pauca adjiciam de variis illius ætatibus atque progressibus, & de vario illius statu usque ad refuscitatas Literas; & denique, quod est præcipuum hujus instituti, ostendere coner qui-

quibus potissimum viris pristinum illud decus atque lumen Arti medicæ apud nos restitutum est, quantumque in hoc laudis genere *Nostribus* jure meritotribuendum.

Nunquam quidem non fuit Medicina, siquidem, ut rectè *Celsus* *, vel imperitissimæ gentes herbas aliaque prompta in auxilium vulnorum morborumque noverunt: Neque enim sylvæ horridiorque naturæ facies medicinis carent, sapientissimo orbis conditore & sacrâ illâ rerum omnium naturâ nusquam non disponentibus remedia in hominum usum. Et cum ita comparati simus, ut multiplex ægritudinum cohors semper terris incubuit, ita procul omni dubio medelæ necessitas ab omni ævo hominum ingenia exercuit. Quæ autem nunc conclusa sunt artibus, omnia quondam, hominum ritu sylvis degentium, dispersa latè ac dissipata, fuitque Medicina paucarum tantum herbarum scientia, &, perindè atque aliæ artes, rudis diu ac inculta.

Quænam gentes illam primùm excoluerunt admodum incertum; constat tamen eam apud

* In Præfatione ad Libr. Primum.

antiquiores quasque, & *Ægyptios* præfertim, plurimo in honore fuisse, & illos qui eam cum aliquâ laude alicubi exercuerint, pro more istorum temporum, in Deorum numerum fuisse re-
latos. *Græci* autem, ut artibus & disciplinis quibuscunque ingenuis, præ aliis, operam navarunt, ita Medicinæ studia, non solum aliquantò magis, * ut apud eundem *Celsum*, sed & magis abundè apud illos, quàm in cæteris nationibus viguerunt.

Hujus rei illustre exemplum habemus in *Hippocrate*, † qui, Scholæ *Coæ* & *Graia* gentis decus, sparsa ista undequaque colligens, ex parvis illis & vulgaribus initiis Artem medicam ferè totam adinvenit, feliciter exercuit, & in scientiam extulit, tum amplissimam, tum fructuosissimam. Vir, divinâ planè indole & fagacitate

* Ibidem.

† Αὐτός θεία φύσει κέχρηται, καὶ ἐκ μικρῶν καὶ ἰδιωτικῶν, εἰς μεγάλα καὶ τεχνικὰ προσήγαγε τὴν ἰητρικὴν--τοσοῦτον ὑπερβεβηκώς τῇ τῆς ψυχῆς εὐφυΐᾳ τοὺς προγόνους, ὅσον διενήνοχεν αὐτῶν, καὶ τῇ τῆς τέχνης ἀρετῇ--πολλὴν γῆν καὶ θάλαττῃν διασπείρων πανταχόθεν, ὥσπερ ὁ Τριπτόλεμος τὰ τῆς Δήμητρος σπέρματα, τὰ τῆς Ἀσκληπιοῦ βουθήματα.
Pæti regis *Epistola* ad *Artaxerxem* magnum, inter *Epistolas*, Sect. 8. Oper. *Hippocratis*.

gacitate plusquam humanâ ; ingenii dexteritate tantò majores superans, quantò eos etiam in Artis excellentiâ : *Æsculapii* auxilia, non secus ac *Triptolemus* dona *Cereris*, per magnos terræ & maris tractus vivus dispergens, & quo ista posteris quoque, in omne ævum, beneficio essent, universam rei Medicæ rationem literis consignans, omnium quotquot sequuti sunt Medicorum facilè princeps & parens unicus.

Quantum autem venerabilis ille Vir, aliique qui illum sequuti sunt, præclara istius gentis ingenia, hæc in re præstiterunt, abundè notum : Vobis præsertim, *Socii doctissimi*, in illorum scriptis versatissimi, quibusque compertum est quousq; processerunt in Medicinâ stabiliendâ. Et sanè, quicunque observaverit ut veteres illi Medicinæ Antistites infinitas morborum series accuratè descripserunt, ut illorum historias, signorumque discrimen, figillatim illustrarunt, ut eventum periodosque exactissimè designarunt, & omnia demùm quæ ad illos vel internoscendos, vel judicandos, vel curandos pertinent, & diligenter investigarunt, & dilucidè enarrarunt, næ is probè intelliget, quàm magnam *Therapeuticæ* solertiæ partem cuncta

gens

gens medentium *Græcis* debeat, quòdque *Græcæ* linguæ cognitio à peritiâ Medicinæ nunquam fit sejungenda.

Græcos tandem superabant *Romani*, armis tamen non artibus; nam si unum aut alterum excipiatis, quotusquisque est inter illos qui ullius artis aut disciplinæ studio tenetur præter Poësin & Oratoriam? Non mirum igitur si illorum temporibus minus augusta & parùm splendida appareat rerum nostrarum facies, & si scientia Medica, fusè adeo à *Græcis* tractata, vix ullum acceperit lumen à *Latinis* literis. *Celsum* unicum fortasse excipiamus, fidelem illum *Hippocratis* interpretem, qui Medicinam, quam ab illo & *Asclepiade*, aliisque *Græcorum* plurimis acceperat, in compendium redegit, & non modò propter Artis scientiam, sed propter scribendi venustatem meritissimò æstimatur.

Qualiscunque verò fuerit rei Medicæ fors apud gentem illam, totius terrarum dominam, cùm pernicioso Barbarorum impetu labefactari cœperit istud imperium, eximia quæque Literarum monumenta unà conciderunt, jacuitque Medicina, impio tumultu vastata, ferâque diluvie tantùm non deleta.

In hoc rerum statu cum diu permanfissent Literæ, inciderunt tandem in manus *Arabum*, gentis bellicosæ & asperæ, sed simul cum armis literarum studia agitantium, & per annos dehinc quam plurimos occupatam tenentium Medicinam, sui que sequaces omnes ferè habentium : Quali autem emolumento, vel Literis, vel humano generi, ex hoc liquet, quod simul atque aditus patuit ad antiquiores Literas, corruebat statim quicquid exædificaverant leviculi isti homines, exoluitque illorum doctrina, nulli solido fundamento innixa, & doctissimorum hominum judicio, non tam ad lucem dandam rebus obscuris, quàm ad obducendum tenebras rebus clarissimis, accommodata.

Lætius hinc sese exhibent res nostræ, & purior æther campos nostros vestit, cùm, renascentibus Literis, antiqui doctrinæ fontes cœperint recludi ; utque erant ingenia hominum nunquàm magis propensa ad omne genus Literarum, sic nullâ in re magis elaboratum est quam ad restituendam priscam de re Medicâ sapientiam, veramque adeò Medicinæ dignitatem.

Hâc in re cùm plures operam suam collocarunt, tùm quinam nobis prius potiusvè commemorandi

morandi sunt quam ii sub quorum auspiciis præclara illorum conamina, tùm orbi, tunc temporis, prosperimè innotuerunt, tùm consultissimè provisum est ut illa ad posteros etiam derivarentur?

Et primus quidem inter hos, me iudice, recenseri debet *Magnificus* ille *Princeps*, sub cuius imperio, & prisca illa Scientia, & Literæ humaniores, & sacrosancta nostra Fides reviviscere ac reformari incœperunt. Præclarus namque iste Rex, ut multa egregia pro re publica, domi forisque sæpius præstitit, ita, perinde atque prudentissimi quique sui ordinis, secum reputans quòd nihil esset vitâ ac salute hominum, vel sibi charius, vel reipublicæ utilius, & quòd multarum rerum cognitio & morum probitas non vulgaris requisitæ sint ad eos qui exercent Medicinam, regii sui officii munus esse arbitratus est prospicere, ut nec quisque qui vel à populo, vel à seipso Medici nomine appellatur, nec raptim & modicè eruditi, nec improbi aliqui homines, quæstus potius & avaritiæ causâ, quam bonæ ullius conscientiæ aut Literarum fiduciâ Medicinam profitentes, Medicinæ praxin, non sine multorum perniciæ, aggredierentur; ideoque
in

in unum coire voluit quotquot cum aliquâ honestate studia illa salutaria secuti sunt, & Collegium hoc instituit doctorum & proborum virorum*, qui improborum istorum conatibus obfisterent, & eorum inscitiamac temeritatem, tam exemplo & gravitate suâ reprimere, quàm per leges regni, & per constitutiones ab illis edendas, punire valeant & coercere. Quid à celeberrimis antecessoribus nostris præstitum fuit ut utilissimo huic instituto satisfactum sit Annales nostri abundè testantur, nec si minus prosperi fuerint conatus magis nuperi, id vitio culpæve Collegii ullatenùs imputandum: Illiberaliter nos tractant ii ad quos appellare nobis sæpius nimium necesse est, aliterque omninò quam priscis illis sæculis, indoctioribus forsan, sed magis sapientibus, & utilitati publicæ meliùs consulentibus.

Honores regi isti proximos nemo æquiùs occupet quam *Is* qui in summo gratiæ & dignitatis gradu apud illum collocatus, & opibus ac honoribus ultra omnes sui temporis subditos auctus, gratiam illam omnem quâ valebat, & studia om-

C

nia

* Vide Chart. Regiam, pro constituend. Collegio.

nia destinabat, ut animum pium, bonoque Literarum præcipuè consulentem testaretur? Vir immensi animi; ad maxima quæque natus; rerum prudentiâ & eloquentiâ instructus, & quo potissimum fautore ac suafore quicquid factum est pro condendâ & stabiliendâ hâc republicâ nostrâ fuit impetratum. Neque hic passus est consilia sua subsistere Vir inclytissimus; cognoscens quippè quod sana eruditio firmissimum sit artium præsidium, *Academiæ Oxoniensis* patrocinium suscepit; ad *Græcarum* perindè atque aliarum Literarum studium eos excitabat; omnibus illorum rebus, maximè quoad rem literariam & exercitia scholastica, vigilantissimè prospiciebat; Lectiones quamplures publicas ibidem instituebat, & adeò exornatam, adeoque in omni disciplinarum genere florentem indies reddidit *Oxoniam*, (Loquor ex Annalibus nostræ Universitatis) ut exteri quique in summam admirationem *Academiæ* istius traherentur, & Nostrates deinceps occasionem non habeant regiones externas disciplinæ gratiâ petendi. Literæ demum quæcunque nunquam magis nitescerent, aut majoribus incrementis auctæ, quàm sub auspiciis *Magni istius Cardinalis*, & *Academia* nullo

nullo ævo sortita patronum, vel ad promovendas Literas, vel ad rem suam ampliandam, vel ad privilegia istius tutanda, studio & affectu propensio- rem, adeò ut fatum illius præmaturum, contra quod summorum Aulicorum aliquandò, inter maximas calamitates habeatur.

Linacrum post hos memorem, *Caicumne*? Illum, tantum non conditorem, hunc, conservatorem & vindicem, hujuscè nostræ communitatis, quique primi inter Nostrates ad perlegendos veteres viam nobis aperuerunt, & artem Medicam, jacentem tùm & penè intermortuam, non solùm refuscitaverunt, sed civitatem hanc pro illâ impetraverunt, eamque & legibus atque institutis optimis roborarunt, & opibus atque honoribus insignissimis ampliarunt: Uterque fanè omnigenâ literaturâ cumulatissimè instructus, & de omni literarum genere vicissim optimè meritus, ac dignissimus certè omnibus elogiis, quotquot solenni hac, aliâvè quavis celebritate, perpenduntur.

Tempus me deficeret si singulos commemorare velim qui honestâ æmulatione accensi, vel arti nostræ promovendæ, vel rebus nostris amplificandis, studia sua collocarunt; si, *Caldwallum*,

& prænobilem socium operis, *Baron. Lumleium*, qui ut res Chirurgicæ intra hos parietes luculentissimè explicarentur, conjunctâ suâ munificentia, effecerunt; si, *Gulstonum*, qui ut idem fieret circa res Anatomicas & viscerum structuram ac morborum sedes, beneficè curavit; si, *Hamæum*, postulante temporum iniquitate, & rerum nostrarum calamitate, multiplici liberalitate insignem; si, *Marchionem Durnovariæ*, qui non dedignatus est inter nos recenferi, rebusque nostris interesse, & centum libras in libros emendos, & deinde eximiam suam Bibliothecam Collegio dicavit; si, *Willisium*; si, *Lowerum*; si, *Whartonum*; si, *Sydenhamum*, aliosque quamplurimos, omnium ubicunque terrarum Medicos celeberrimos, qui *Spartam* hanc, & suam, & nostram, scriptis suis, affatim cohonestarunt; si, *Harveium* demùm, maximum virum, & Collegii hujus Gentisque nostræ summum decus ac ornamentum; cui debemus inventa illa, nunquam moritura, *de Circulatione Sanguinis*, & *de Generatione Animalium*; cuique, inter quamplurima alia, non sapienter minùs quàm magnificè in nos à se collata, annuam hanc illustrium antecessorum

tecessorum nostrorum commemorationem, & festivitatem subsequuturam.

Sed & cur ego vetera ista conquirerem, cum nobis liceat uti magis recentibus exemplis & non ita pridem vivis? virorum nempe in Arte nostrâ præstantissimorum, quique meritis suis, & nos, & alios sui memores effecerunt.

Ecquis enim majori eruditionis aut honestatis cujuslibet laude societatem hanc unquam exornavit, quàm *Gulielmus Gibbons*? Præsignis ille senex; in Artis professione candidus & apertus; in studiis indefessus; literarum & literatorum, & suorum *Oxonienſium* amantissimus; in praxi Pietatis & Medicinæ simul exercitatissimus; erga pauperes maximè beneficus; in toto vitæ cursu verè Christianus; moribus antiquis, hoc est, optimis, & quo vix superiorem, inter eos quibuscum inclaruit, repertum iri confido, paucissimos certè pares.

Proximus sese offert, Vir & naturâ admirabili, & ingenio peracri, & doctrinâ eximiâ, & Genio loci, in quo enutritus est, abundans, *Johannes Freind*, Iapis ille alter,

Cui suas artes, sua dona lætus,

Et

*Et lyram, & venæ salientis iētum
Scire concessit, & celerem medendi
Delius usum.*

Hinc, non in suâ modò Arte, sed omni politiore elegantia excultus, & cum optimis doctissimisque quibusque versatus, nil mirum si in re Medicâ scriptis exornandâ non minus accuratus fuerit, quàm in eâ exercendâ felix, sique nihil prius habuerit quàm ut suus honos, tùm Collegio, tùm utilissimæ nostræ scientiæ constaret, donec in principem Medicorum fermè evectus, perpetuis studiis, laboribus, vigiliis, itineribus exercitus, ex immodicâ fatigatione, (ut notissimis in unaquaque professione sæpè accidit) morbo correptus, triste sui desiderium reliquit.

Nequè verò hic prætermittendus est *Richardus Hale*, qui quanquàm primo intuitu, ut ii plerumque qui maniacorum curam aliquamdiu habent, quadantenùs asper, non illo tamen quifquam benignior, amicier, doctior, aut melior : Eâ quippe comitate & integritate ut relligio sibi fuerit alios in errorem ducere, eâ etiam sapientiâ atque eruditione quæ sibi ab aliquo imponi nullo-

latenùs

latenùs paterentur ; singulari amore in viros suæ Professionis ; multi in illâ nominis, eamque adaugere & exornare omni ratione contendens ; *Academicorum* honorem atque commodum præcipuè promovens ; dignitati & utilitati hujus Collegii animitùs prospiciens, & legatis quingentis libris pro coemendâ supellectile literariâ, illud munificè ditans ; tam probus denique tantusque, tam in arte suâ, quàm cæteris vitæ muniis, ut illius lethum fuerit, juxta ac illud *L. Crassi* apud Ciceronem*, *acerbum suis, luctuosum patriæ, grave bonis omnibus.*

Hisce præclaris exemplis excitati, illorum vestigiis, *Collegæ ornatissimi*, feliciter insistatis.— Studio igitur in quo estis, incumbite, & in re Medicâ promovendâ omnibus nervis elaborate. Tribuatis huic quantum temporis poteritis ; poteritis autem, pro maximâ parte, quantum velitis ; vix est quisquam è nobis quin illi interdum, ex insperato, fat suppetit otii. Quanto plus præstamus in eruditione, tantò magis aliquandò existimabimur : Imperitia autem, quemadmodum annotavit parens,

* *Libr. 3^{tio}. De Oratore.*

parens noster *, malus thesaurus, malæque opes reconditæ pro iis qui eam possident; timiditatis enim & audaciæ nutrix est, quarum hæc Artis ignorationem, illa impotentiam arguit. Artem nostram *Apollineam* omnimodè honestate; dignitatem vestram omni studio tuemini; honori & utilitati Collegii in omnibus rebus consulite; Matris communis, h. e. *Academiæ utriusque*, amorem servate, & ita tandem, quantum vos curæ & beneficentiæ majorum nostrorum debetis, tantum vobis, serò precor, debituri sunt posteri.

* Hippocrates Pag. 2.

Ἡ δὲ ἀπειρία, κακὸς θησαυρὸς, καὶ κακὸν κεμήλιται τοῖσιν ἔχουσιν αὐτέῳ δειλὴς τὲ καὶ θρασύτης τιθῆναι. δειλὴ μὲν γὰρ ἀδυναμίην σημαίνει, θρασύτης δὲ, ατεχνίην.



O R A T I O
ANNIVERSARIA
IN THEATRO COLLEGII
MEDICORVM
LONDINENSIVM,

Ex HARVEII instituto,

Habita, Die 18^o Oct.

A. D. MDCCXLII.

A BENJ. HOADLY M. D. Coll. Med. &
S. R. S.

LONDINI:

Impensis JOHANNIS & PAULI KNAPTON, MDCCXLII.

PRÆSIDI DIGNISSIMO
HENRICO PLUMPTRE M.D.

E T

SOCIIS DOCTISSIMIS
Collegii Medicorum Lond.

H A N C

O R A T I O N E M

ILLORVM IVSSV EDITAM

D. D. D.

BENJ. HOADLY.

RECEIVED

LIBRARY

SECTION

College Museum

1900

RECEIVED

LIBRARY

1900

1900



ORATIO HARVEIANA.



UOD Ego, hoc in loco & tempore, Oratoris Harveiani personam sustineo, potius quam munere fungor, magno vestrarum aurium incommodo, (Socii, & Auditores doctissimi) id totum tibi (Præses dignissime, & mihi multis nominibus colende) referri debet. Tu enim ita voluisti——

Orationis habendæ, in doctorum virorum frequentia, difficultatem, quam ab ineunte adolescentia ad hunc diem pertimui, & nunc pertimesco——Ingenium, in hujusmodi præsertim rebus, exiguum——Nullum Usus——Ne minimam quidem dicendi Exercitationem :——Omnia, quæ potui, excusavi. Tu vero has meas, non quæsitæ, sed justas & infucatas, excusationes adeo non probasti, ut constanter in proposito permaneres. Vicisti, igitur, uti par est; & Ego, vestro jussu Orator repente factus, coram adsum; aliquid dicturus, si modo potero, ab Harveiana hujus diei institutione non omnino alienum.

SI ducenda sunt a DEO omnium maximarum & optimarum rerum principia, tum præcipuè Medicæ artis, miseris hominibus adjuvandis natæ: quam unâ cum morbis, malis, & ægritudinibus humanis, & nasci, & incrementis augeri, Ille optimus maximus omnium rerum Conditor vere dicitur voluisse. Illi enim visum est, & his malis humanum genus, in hoc animantium domicilio, circumdare; & materiam medicam ubique sparsam sensibus eorum

eorum objicere ; & eâdem operâ Homines rationis & ingenii vi instruere, ad omnia exploranda, tentanda, invenienda, & paranda, quæ salutis Hominum inservire possent. Hinc igitur, Dei quasi jussu, Medicina, Ars Valetudinis ; primò rudis, incondita, fortuiti vel temerarii tentaminis Res ; deinde gradatim ad majora ascendens, acrius experiundo, & Naturæ ipsius indicia accuratius observando, & constantius colendo, tandem facta, qualem nunc videtis : gloriam magnam, & penè divinam consecutura, si modo totis viribus, qualescunque sint, re perficere contendat, quod verbis, & nomine promittit.

Quid enim in hac rerum Universitate magis magnificum, & hominibus gloriosum ? Quid eos ad similitudinem Deo propius facit accedere, quam plurimis prodesse ? quam miseriis, quæ omnes premunt, & calamitatibus, quibus gens humana perpetuo objicitur, opem ferre ; quam vitam brevem, & ærumnosam, (breviorē, & ærumnosiorē, sine Artis adjumentis & allevamentis, futuram) aliquantūm protrahere ;

& mala arcendo, minuendo, & mitigando, placidiorem, & leviozem reddere ?

Immortalitatem mortalibus arte medicâ donare Nemo fanus unquam vel in animo cogitavit. Sed aliquid certe est, Mortem, adeo mortalibus invisam, & a tergo quotidie prementem, paululùm remorari, & repellere ; aliquid est, morbos molestissimos relevare, & illorum acumina hebetare ; omnes recte & diligenter curare, plurimis etiam omnino mederi ; aliquid est, de mortalium acerbissimis doloribus partem detrahare, alios lenire, alios sæpe depellere & amandare.——Hæc non sunt minimæ laudis. Sed longius ea persequi non est instituti hodierni. Intra Diei ipsius rationes, & Collegii nostri limites, continenda est Oratio. Si ergo sæpius antehac dicta repetendo aures vestras contundam ; date hanc veniam ipsi huic Institutioni, quæ hoc a nobis postulat, ut Eorundem illustrium Virorum Nomina, qui hoc Collegium aut primo statuerunt, aut re postea auxerunt, aut ingenio ornarunt, Immortalitati mandare (quantum in nobis est) quotannis enitamur.

DE LINACRO nostro, ante omnes primo, gloriari & merito possumus, & debemus. Erat is vir, cum literis latinis, tum etiam græcis, inter multos ejusætatis eruditos, eruditissimus. Post justos annos *Oxonii* humanioribus literis impenso, in *Italiam* se contulit; non inani studio, vel loca amœna, vel antiquis nominibus nobilitata, visendi; neque ut curiosum se in alienis rebus publicis præberet; sed ut oculis suis Literarum, Florentiæ & Romæ præcipuè, tunc renascentium, progressum videret, & ut auribus suis Viros omni genere doctrinæ instructissimos audiret; ut ab Horum ore penderet, & ad Hos summos viros imitandos, & tandem superandos, sese formaret. Domum itaque reversus, non nugis & fabellis viatoriis, uti mos est, aures vel oculos popularium suorum demulcere, & detinere, dignatus est; sed ad amplificandam & ornandam rem literariam, & medicam, se totum accinxit. Veteris Romæ rudera; Statuas, & Statuarum disjecta membra; Amphitheatrorum moles, & fragmina;——Has, aliasque omnes, immitis Temporis reliquias, aliis, otiosis & curiosis, laudandas & describendas reliquit.

Majora

Majora longè ille animo in Itinere cogitabat, quæ postea Domi, magnâ cum laude perfecit. In Aulam, Henrici Septimi jussu, ad regiam, & regiæ prolis, salutem tuendam, ab Oxonio (ubi Professoris Cathedram tum ornabat) arcessitus, post primos Invidiæ impetus virtute fractos & repressos, sub illo Rege, et sub filio Henrico Octavo, summâ & Dignitate & Gratiâ, diu floruit.

INTER has graviores curas, per multos annos feliciter continuatas, non erubuit *Grammaticam*. Ejus enim rudimenta, Anglico sermone conscripta, in Anglorum omnium Usum primo edidit; & postea (ut ipsius verbis utar) *ad Mariæ Regis filiæ generosum ad studia literarum ingenii impetum juvandum & fovendum, in summam, quam potuit, redegit claritatem*. Hæc rudimenta abunde laudavit Buchananus, magnum illud Scotiæ Decus, Latinitate ea donando, & in exterorum omnium grâtiâ publici juris faciendo. Tanti ea fecit Vir Maximus!——Parva sunt hæc, fateor; & parva esse Linacer ipse bene novit: sed sine parvis Magna non constare persuasum sibi habuit.

buit. Et quidem ex his parvis, aliisque ejusdem generis Eruditissimi viri laboribus ad linguarum cognitionem spectantibus, Fama fui nominis tanta fuit, ut a doctissimis ejusdem ætatis viris, primus & princeps Literarum humaniorum in his locis instaurator merito celebraretur.

His vero non contineri potuit Linacri animus: sed, gentis humanæ commodis semper intentus, cum se Regio favore tutum satis & munitum sensisset, Gratiam illam eximiam, quam adeptus est, ad utilitatem publicam convertere apud se statuit: Et, propenso illo quo erat in commune bonum animo, Medicinam præcipuè resuscitandam, tuendam, augendam, & ornandam, suscepit. Quid multa? Prudentissimus rerum Estimator recte secum cogitavit Regem Patriæ Patrem esse debere; Paternum & Regium esse saluti Civium, tanquam filiorum, prospicere. Et cum in eâ sententiâ esset, Artis Medicæ Exercitationem nullis legibus obstrictam, Licentiam esse immanem, & Valetudini Hominum maxime inimicam; Collegium hoc non solum instituit, & Statutis circumscriptis;

scripsit; sed Regiis literis, & Legum auctoritate, confirmari & muniri curavit; ne statim in auras evanesceret utilissimum Ejus consilium. Primus ipse Præses, in Ædes, quas ipse habitabat, dum viveret, Socios convocabat; & Præses moriens easdem societati legavit, perpetuum Conventus locum. Duo præcipue in animo habuisse videtur: Unum, ut Statutorum vi, Qui a literis alieni, indocti omnino, & ex omni parte inculti, non solum ab hac Societate perpetuò arcerentur, sed intra quosdam limites designatos in Medicâ arte se exercere non auderent; Alterum, quod omni laude nobis celebrandum, ut mores Suorum, præsertim inter se mutuos, præceptis formaret, & regeret; & Præceptis quidem, quæ, aureis literis digna, probitatem simul & humanitatem Statuentis spirant: Qualia, si non semper rei medicæ in honorem, & utilitatem cedant, Hoc nullo modo, (liceat mihi dicere) nisi nostrâ culpâ, & cum nostro dedecore, fieri potest.

IOANNES CAIJUS semper nobis in hac annuâ celebratione cum Laude nominandus. Summam ejus eruditionem, & accuratam linguarum

rum peritiam, testata est Italia ipsa; quam Ille quoque (Linacri ad exemplum) adiit, atque, ad ingenium colendum, doctissimos viros, ibi tunc degentes, avidè & attentè audivit: Ipse tanto apud eos in honore, ut non solum Doctōris titulo * *Paduæ* insignitus, quod quotidianum est; sed, quod raro fieri contigit, Græcæ Linguæ Prælectoris munere, ipse Hospes & Peregrinus, ornatus esset. Munificentiam ejus, & propensum in literas Amorem, per omnia sæcula testabitur Cantabrigia. Post reditum enim in Patriam, famâ & opibus tandem dives, Collegium apud suos Cantabrigienses, secundo (eoque suo) nomine decoratum, ædificiis, &, quod multo majus est, emolumentis, & annuis stipendiis, præclarè auxit; ad alendos & sustentandos tres Socios, & viginti adolescentes literis ibi operam dantes. Hæc, quæ verè magna sunt, & memoratu digna, ad Theologiæ, & omnimodæ Literaturæ, præsertim vero Artis

* Ita Tabulæ Cantabrigienses antiquæ, in annuâ ipsius Cui Commemoratione semper

recitatæ: *Bononiæ*, Alii tradunt; incerto nescio-quo testimonio, uti videtur, ducti.

Medicæ, augmentum & progressum, optimo animo, & cogitavit & perfecit. Quod ad hanc Societatem attinet ; Mitto Insignia illa, in Collegii usum ab ipso excogitata & dedicata ; quæ & Virtutis Insignia vocari Bonus Vir voluit. Sed non mitto Patrocinium insigne, quod nostris rebus, in discrimen adductis, omni operâ, & totis ingenii viribus, feliciter præbuit : Neque hoc filebo, Caium nostrum, muneribus omnibus ad Collegium hoc pertinentibus, per multos annos, diligentissime & cum honore functum, administrationis inculpatae Exemplum aliis reliquisse.

CALDWALLI, & nobilissimi LUMLEII, conjuncta munificentia, rei Anatomicæ, & proinde Medicæ, utilissima, nunquam nobis tacenda ; Si rem ipsam solùm spectemus, præclara ; sed præclarius facta Harveianis Prælectionibus nunquam satis laudandis.

ET GOULSTONUS hic quoque cum honore memorandus, qui Prælectiones Medicas, ad scientiam & Curam & Medelam Morborum,
 accu-

accuratissimè formatas & aptatas, instituit, & honesto stipendio donavit.

AD HARVEIUM properat Oratio, quo Nemo, post homines natos, felicior in indagando, inveniando, & explicando, quæ Medicinæ veram gloriam & accuratam exercitationem longius latiusque extendere possint. Ille quoque, post Cantabrigiensia studia, Italiam adiit, non ut Pictorum, vel suave-modulantium Cantorum sedem; sed ut, iis temporibus, Humaniorum Literarum & Medicinæ Theatrum insigne; & quasi totius Europæ alteras Athenas. Doctor ibi Paduensis, & postea Cantabrigiensis; Regius item Medicus. Sed ab his nominibus, (quamvis magna sonantibus) non pendet Harveiani nominis gloria. Æternam sibi famam non ex vocibus & sonis, sed ex laboribus & vigiliis, Vir Maximus conquirit, & comparavit. Imò, ex solis Prælectionibus Caldwellianis *de Motu Cordis & Sanguinis*, tantam gloriam, omnium consensu & plausu, consecutus est, quantam Nemo fere alius mortalium etiam doctissimorum unquam adeptus est.

ERANT quidem apud Exteros perpauci, qui, pessimo animi morbo laborantes, inviderunt Optimo viro præclarum suum Inventum ; & totis viribus conati sunt gloriâ tantâ Nomen ejus spoliare. Et post hoc breve & iniquum certamen, quod statim evanuit, Erant alii, qui quasi rem levem, & nullius momenti ad Scientiæ Medicæ augmentum, tractarunt ; utilitatem Inventi omni operâ diminuere, vel potius omnino delere, contendentes : & nihil Harveio relinquentes præter inanem illam Curioforum, non Gloriam, sed speciem vel imaginem Gloriæ, Harveianâ indole indignam. Gloriam enim ab utilitate sejunctam, ut in re medicâ nullius pretii, bene novit Vir magnus repudiare potius quam sibi sollicitè vindicare. Sed omnia hæc & talia commenta diluit Dies, veritati semper amica.

POST hos, & alios plurimos Harveii in Medicinæ culturâ labores doctissimos, quibus totum genus Medicum, & genus etiam humanum, sibi in æternum devinxit, non Nobis filenda est egregia, & penè inaudita erga nos Benevo-

nevolentia, quâ non solum Collegium Ædificiis novis, & Libris auxit ; sed Se adhuc vivum paterno fundo exuere non dubitavit, ut nostris rebus succurreret : Undè & Ædium conservationi consuluit, & Bibliothecario & Oratori sua præmia constituit ; atque etiam honesta convivia parari, & ornari voluit, ut mutuæ inter Nos amicitia signa essent, & incitamenta ; ut vultu hilariore, & apertiore pectore, & colloquio liberiore, nos ipsos mutuo exciperemus ; &, animas animis conjungentes, communia consilia facilius iniremus : Hæc enim sunt vera Ingenuorum Convivia. Sed de tanto Viro, Quid talia memoramus?—Dum Sanguis per humani corporis Arterias & Venas, divino plane artificio, fluit, & refluit, Honos, Nomenque HARVEII, Laudesque manebunt.

HARVEIUM proximè sequitur HAMEIUS, Cujus in hanc societatem tanta sunt merita, ut ipsius Auctoris non multo majora dici debeant. Ædes ipsas Linacrias, atque omnia Collegii Bona & Emolumenta, Præconis iniquæ voci subiecta, suo Ære redempta ; Easdem Ædes
postea

postea incendio illo luctuoso consumptas, am-
 plioribus & comptioribus compensatas, seu po-
 tius longe superatas, quales nunc videmus—
 Quosdam etiam ex Amicis conjunctissimis, ex-
 emplo & suasu suo, in societatem beneficen-
 tiæ adductos—Hunc ipsum fortasse Conven-
 tum;—Hæc & plura, HAMEIO debemus:
 Quæ quidem talia sunt, ut merito laudis ejus-
 dem cum Linacro particeps fiat; non solum
 laudis quæ ad linguarum accuratam scientiam,
 & in literas ardorem; sed Ejus, quæ ad nostra
 hoc in loco commoda pertinet: in quibus om-
 nibus *Linacro* tantum secundus, & parvo inter-
 vallo proximus. Si enim Hic, qui fundamenta
 primus posuit, Institutoris, & Auctoris Laudes
 meruit; Ille, qui Instaurator, Restitutor, &
 Amplificator; sine cujus ope & munificentia,
 Societas ipsa, quantumvis accuratè fundata &
 exstructa, si non dissipata & projecta periisset,
 certe inculta & squalida jacuisset; æqualem fe-
 re videtur, eamque eximiam, gratiam à nobis
 meruisse. Et, quod nullo modo prætereun-
 dum est, Ille idem HAMEIUS, qui his Bene-
 ficiis

ficiis vivus adhuc Nos affecit, in Morte etiam eandem in hoc Collegium animi benignitatem legatis prædiis demonstravit.

NOBILIS DORCESTRENSIS hanc nostram Societatem sibi & Memoriam suam devinxit, amore illo, quo Medicos semper coluit; studio, quo ipse in Medicinæ notitiam, & familiaritatem, quasi raptus est; munificentiam, quam Librorum ingenti copia Bibliothecam nostram ditavit; & postremo magnam illam in Artem nostram animi propensione, quam ipse inter Medicos nomen suum professus est; atque ita Collegium nostrum summo honore affecit. Et hinc quidem Occasio nobis arripienda est Duos ex nobilissimis nostræ Ætatis viros, grato animo, & omni laude prosequendi, qui Annales nostros nominibus suis illustriores fecerunt — Grande Decus simul & Præsidium Nobis, & Rei Medicæ! *

P O S T

* Nescio-quo Errore meo, in enumerando præclaros illos viros, quorum beneficentiæ

& largitati multum debet hoc nostrum Collegium, HALEI mentionem nullam feci. Pudet Me

POST hanc tot Virorum excellentium Commemorationem, tam prolixè explicatam, qui hoc Collegium beneficiis & emolumentis, quidam etiam & scriptis præclaris, instruxerunt & ornarunt; Si per tempus liceret de omnibus aliis quoque nostris singulatim dicere, qui doctissimis suis laboribus, dum in vivis essent, Rem Medicam auxerunt, & de eâ optime meruerunt; libentissimè eorum Nomina, non sine laude debitâ, à primordiis hujus Societatis usque ad nostra tempora, ordine deducerem. Verum Dies ipsa me deficeret aliquid dignè dicere conantem de tot vix enumerandis Viris. Neque quidem opus est. Nam cùm Eorum nomina in summâ laude & gratiâ apud omnes jam pridem constituta sunt; tali auxilio, & tali Prædicatore, eorum Fama non omnino eget.

AD nos ipsos nunc se vertit Oratio. Tot ac tanta nostrorum Exempla repetentes, si eorum

Me negligentiae. Eruditissimi enim viri Nomen locum sibi jure vindicat in hac annuâ Commemoratione, propter Munificentiam illam, nunquam

nobis obliviscendam, quâ quingentas libras in usum & Augmentum Bibliothecæ nostræ legavit.

Memoriâ animati, & excitati, (de quo non dubito) ingenuâ cupiditate ardemus eandem gloriam consequendi; HARVEIUS ille nobis quasi digito viam monstravit. *Naturam ipsam suorum Arcanorum fidissimam esse Interpretem*, Vox fuit *Harveii*: Et si ipsa Medicina loqui posset, eâdem voce uteretur. Huic uni principio Ille innixus, & attentus, omnes suas curas instituit; & omnia fere, quæ speranda essent in nostrâ Arte, invenienda, & demonstranda, non dubitavit. Hâc Voce, aliorum virorum gravissimorum suffragio comprobatâ, & Experienciâ & multorum annorum Ufu confirmatâ, Omnes tandem edocti, Hypothesibus (quas dicunt) etiam speciosissimis abjectis, & repudiatis, ad ipsius Naturæ indicia animos attendimus.—Ægrotorum cubiculis, & lectis, inhærere; Morbis ipsis perpetuò invigilare; Eorum Sedes, Constitutiones, Mutationes, & Vicissitudines, diligenter & accuratè observare—Hæ sunt nobis Artes: Atque his solis, Artis nostræ utilitatem omnibus probare, & Saluti hominum,

D

quæ

quæ in nostrâ tutelâ est, consulere, contendimus.

STUDIORUM & Laborum ita institutorum Virtute ; Linacrii Collegii Auctoritate ; & sub Auspiciis Virorum nunc in civitate Medicâ jure principum, suis meritis illustrium, & aliorum honestis conatibus semper faventium ; Mihi quidem videor videre Medicinam caput attollentem, & ad altissimum dignitatis gradum properè ascendentem.

ET Tu, Optime LINACER, si qua Te apud Superos nostrarum rerum Cura tangit, paterno animo tuum Collegium spectâ. Primo, Caium, Harveium, Hameium, aliosque aspice, tuis Vestigiis insistentes, & tua incepta summo studio perficientes. Deinde, ad nostra usque tempora oculos dirige ; & si gaudiis cœlestibus nostra admisceri fas est, Gratulare tibi——Præsidem, & Doctrina, & Moribus, quales ipse velles, excellentem ; & ut verbo dicam, Decessoris optimi & doctissimi Successorem dignissimum——Socios Omnes, uno tantum excepto, Te & tuâ Institutione dignos ; Juniores

ores erga Seniores observantissimos ; Seniores erga Juniores candidissimos & humanissimos—Omnia intra hos parietes, & votis tuis, & legibus, consentanea — Nulla diffidia, nullas similtates—Nulla vel Odii vel Invidiæ vestigia—Unum hoc inter nos Certamen, Quis melius, & felicius, salutem hominum inserviat ; famam ex hoc solo quærentes, & partam tuentes.

TALIBUS Exemplis, atque his Moribus, cultum, auctum, & ornatum, Collegium tuum, Tu ipse, Optime LINACER, amabis, & laudabis.

Lately Published,

THree Lectures on the Organs of Respiration. Read at the Royal College of Physicians at *London*, *A. D.* **MDCCXXXVII.** Being the *Gulstonian* Lectures for that Year.

To which is added, An Appendix, containing Remarks on some Experiments of *Dr. Houston's*, published in the Transactions of the Royal Society, for the Year 1736.

By B.
the College

Fellow of

O R A T I O
A N N I V E R S A R I A

In THEATRO
COLLEGII REGALIS
MEDICORUM LONDINENSIIUM

EX

HARVÆI INSTITUTO

HABITA

POSTRIDIE *D. LUCÆ*, 1747.

